



Bilten općine Cazin

Godina 2009 / Maj / Broj 1



*Suradnja javnih
komunalnih
preduzeća općina
sliva rijeke Une*

*Proglašen budžet
općine Cazin*

Smjene u cazinskoj LOT kući

*Općina Cazin i mljekara MEGGLE
uspоставljaju suradnju*

Posjeta gradu Rijeci

Dobro došli na stranice biltena općine Cazin

Dragi moji sugradani,

Vodeći se idejom razvoja komunikacijskih tokova između organa uprave i građana općine Cazin, pokrenuli smo informativni bilten. Prvi broj je obilježen presjekom važnijih vijesti koje su okarakterisale novi mandat aktuelne administracije. U njegovoj budućoj realizaciji možete učestvovati i Vi, dragi sugradani, šaljući Vaše komentare, pitanja, prijedloge i sugestije.

Namjera nam je da ovaj bilten bude sredstvo za pružanje informacija o svim aktivnostima na prostoru naše općine, pa čak i šire. Nadam se da će isti postići svoju osnovnu komunikacijsku svrhu na obostrano zadovoljstvo organa uprave i građana općine Cazin. Iskrena nam je želja da ovaj informator ponudi i potrebne informacije za potencijalne investitore, ali i turiste, što je svakako jedan od osnovnih ciljeva naše programske orijentacije i vizije razvoja općine.



Mediji USK-a u posjeti načelniku

Predstavnici javnih i privatnih medijskih emitera sa područja USK posjetili su 25. februara općinu Cazin i razgovarali sa načelnikom Ogřeševićem o položaju medija, njihovim potrebama i planovima za naredni period.

Ovaj sastanak inicirala je direktorica RTV Cazin Azra Bajrić, zajedno sa predstavnicima radijskih kuća iz Bosanke Krupe, Bihaća, Velike Kladuše i Ključa. Svrha sastanka jeste dogovor o zajedničkom nastupanju prema višim nivoima vlasti u potrazi za dodatnim sredstvima sufinansiranja i apliciranja zajedničkih projekata.

Na sastanku je naglašeno da praksa financiranja sa kantonalnih nivoa već postoji u pojedinim dijelovima BiH (Tuzlanski kanton, Zeničko-dobojski, Hercegovačko-neretvanski i sl.), čime se olakšava put za realizaciju pokrenute inicijative i u našem kantonu. Također se u zahtjevima navodi i potreba za uvođenjem stručne službe pri resornom ministarstvu ili Vladi USK koja bi omogućila kvalitetniju saradnju između medija i predstavnika vlasti, ali i očuvala položaj radnika u medijima kroz podršku njihovim inicijativama. U narednom periodu je planirano održavanje ovih sastanaka svaka dva mjeseca, kako bi se intenzivnije radilo na kreiranju boljih uslova egzistiranja i rada svih kantonalnih medija. Načelnik Ogřešević je podržao ovu zajedničku inicijativu, sma-



trajući da je neophodno ojačati finansijsku i tehničku strukturu javnih, ali i privatnih emitera na našem kantonu. "Mediji su bitan preduslov razvoja demokratskih faktora egzistiranja i rada lokalnih zajednica, te im se zbog toga mora osigurati određeni okvir u kojem će realizirati profesionalno, neovisno i transparentno izvještavanje", istakao je načelnik Ogřešević.

Juniorske reprezentacije BiH i Slovenije u općini Cazin

U kabinetu načelnika općine upriličen je posjet selektora i trenera dvije juniorske reprezentacije, selekcija U-19, koje su boravile u USK u okviru baražnih priprema za odlazak na evropsko juniorsko nogometno prvenstvo.



Ove godine domaćin prijateljskih susreta su općine Bosanska Krupa i Cazin, koje su svojim pokroviteljstvom pokazale istinsku brigu i posvećenost omladinskom sportu i afirmaciji sporta na našim prostorima.

Koordinator za omladinski nogomet bosanskohercegovačke reprezentacije Denijal Pirić izrazio je veliku zahvalnost na gostoprimstvu i podršci općine Cazin i općinskog načelnika u organizaciji ovih susreta. "Smatramo da je sport najveći ambasador svake zemlje, a to je ono što je ova postavka općinskog vodstva pre-

poznala još u svojim podrškama i gostoprimstvu malonogometnoj reprezentaciji BiH", naglasio je gospodin Pirić.

Gospodin Iztok Gustinčić bio je impresioniran dočekom i organizacijom prijateljske međunarodne utakmice, zahvaljući svim navijačima i gostima koji su svojim prisustvom uveličali ove utakmice.

Načelnik Ogřešević obratio se gostima riječima velike podrške i želje da se ovakvi sportski događaji i dalje organiziraju u našoj sredini. "Imamo sve pretpostavke za izgradnju kapaciteta i uspostavljanje jače i bolje organizacije sporta i sportskih aktivnosti u općini Cazin, što ćemo u narednom periodu svakako i iskoristiti", riječi su gospodina Ogřeševića.



Načelnik ugostio predstavnike američke ambasade u BiH

U okviru posjete USK predstavnici američke ambasade u BiH posjetili su općinu Cazin. Službenica za političke odnose u administraciji američke ambasade, Melisa Schoemaker i načelnik Ogřešević razgovarali su o privrednoj i političkoj situaciji u našoj općini i regionu. Gospodin Ogřešević je objasnio glavne karakteristike naše općine, njenog položaja, infrastrukturnog napretka, realnog planiranja u realizaciji projekata i suradnji sa općinama u okruženju. Kao najveći prob-

lem sa kojim se naša općina susreće, načelnik je istaknuo reformu zemljišnih knjiga, nedovoljnu sinergiju između svih oblika vlasti, kao i nedostatak finansijskih sredstava sa viših nivoa, bilo da je riječ o kantonu ili federaciji.

Na kraju razgovora gospodica Schoemaker je izrazila veliku zahvalnost zbog organiziranog prijema i korisnih informacija, te izrazila želju za nastavak suradnje.

Malogranični prijelaz Tržačka Raštela

U kabinetu načelnika općine održan je sastanak sa predstavnicima Državne komisije za integrisano upravljanje granicom BiH na temu otvaranja malograničnog prijelaza Tržačka Raštela. Na sastanku je konstatirano da je već ranijim sporazumom između dvije države ovaj prijelaz definiran kao granični prijelaz za pogranično područje.

Međutim, jedan od razloga posjete jeste i zahtjev općine Cazin upućen nadležnom ministarstvu sigurnosti i Državnoj komisiji za integrisano upravljanje granicom BiH, da se ovaj granični prijelaz otvori za međunarodni putnički saobraćaj.

Istaknuto je da se radi o pitanju koje zahtijeva usaglašavanje na državnoj razini između BiH i Republike Hrvatske i da će se to pitanje tretirati na jednom od narednih sastanaka nadležnih tijela između dvije države.

Načelnik općine istakao je da postoje višestruki interesi za otvaranje ovog malograničnog prijelaza. U prvom planu to se odnosi na putnički promet i olakšavanje života i rada lokalnog stanovništva, posebno onih koji imaju posjede sa obje strane granice, ali i za promet velikog broja naših ljudi koji rade u zemljama zapadne Evrope, a naravno, tu je i potencijalni turistički interes ovog kraja u povezivanju sa Plitvičkim jezerima.

Sastanak načelnika Ogreševića i Lipovače

U kabinetu načelnika općine Cazin održan je radni sastanak predstavnika dvije susjedne općine. Višebrojna delegacija sa obje strane, sastavljena od predstavnika organa uprave obje općine, ali i članova zakonodavne vlasti, inicirala je mnogo značajnih projekata i konkretnih koraka koordinacije budućih aktivnosti. Načelnik Ogřešević izrazio je veliko zadovoljstvo iniciranjem ovog sastanka i odmah na početku potaknuo ključne segmente komunikacije i saradnje na realizaciji značajnih projekata, kako za općine Bihać i Cazin, tako i za USK. "Neke od najvažnijih potreba jesu zajednički nastup prema višim nivoima vlasti, zajedničko osiguranje sredstava za projekte od obostrane koristi, mnogostruke koristi za obje općine od otvaranja malograničnog prelaza Tržačka Raštela, uspostavljanje zajedničke turističke ponude, zdraviji pristup komunikaciji i sl.", riječi su gospodina Ogřeševića.

Gospodin Lipovača je načelniku Ogřeševiću česti-

tao uvjerljivu pobjedu na izborima i istaknuo neophodnost saradnje ove dvije općine. "Mi smo od Cazina kopirali uspostavljanje sinergije u saradnji građana i općine kod realizacije infrastrukturnih projekata", naglasio je načelnik Lipovača. Izdvojio je i potrebu zblizavanje organa uprave, kao i zajedničku borbu i apel prema kantonalnim vlastima o neophodnosti zadržavanja grantova za socijalnu pomoć. Također je prvi put inicirao ideju o gradnji zajedničkog civilno-turističkog aerodroma na našim prostorima i rješavanje otpada njegovim pretvaranjem u energiju. Nakon sastanka predloženi su članovi radne grupe sa zadatkom uspostave konkretnih aktivnosti na rješavanju iniciranih projektnih ideja. Naglašen je značaj ovakvih sastanaka i potaknutih pitanja, ali najvažnije od svega jeste čvrst zajednički stav oko krucijalnih pitanja za kanton, jer se, prema riječima prisutnih, glas stanovnika ovog dijela BiH mora čuti i uvažavati u planovima za njegovu budućnost.



Općina Cazin i mljekara MEGGLE uspostavljaju suradnju

Načelnik Ogršević je organizirao sastanak sa predstavnicima mljekare MEGGLE Bihać i općinskog udruženja poljoprivrednih proizvođača, kako bi razgovarali o situaciji u ovom sektoru privrede na prostoru općine Cazin i mogućnostima suradnje kroz javno-privatno partnerstvo, te uspostavljanju zajedničkih programa pomoći, sa naglaskom na proizvodnju mlijeka.

Osvrćući se na prošli period i sredstva koja su ove godine planirana budžetom za ove kategorije proizvođača, načelnik je istakao da je cilj općine da omogući opstanak našim poljoprivrednicima i obezbijedi njihovu konkurentnost na tržištu.

Direktor mljekare MEGGLE Marijan Vučak statističkim je podacima dokazao da je općina Cazin jedan od najvećih proizvođača mlijeka na teritoriji USK. Naglasio je i činjenicu da je ova kompanija svoju sakupljačku djelatnost počela razvijati upravo na prostoru općine Cazin, koja danas plasira oko 8 miliona litara mlijeka godišnje i veže oko 1.300 kooperanata, proizvođači danas isto koliko nekad 3.900 kooperanata u 2004. godini. Vrlo značajan podatak o ozbiljnosti potrebe za uređenjem ove kategorije jeste i činjenica da svaki mjesec kooperanti iz općine Cazin naplate 300.000 KM. Gospodin Vučak je ponudio nekoliko interesantnih rješenja, između kojih je i stvaranje neke vrste revolving fonda u javno-privatnom partnerstvu između Općine i mljekare za finansiranje nabavke mašina, raznih vrsta priključaka i sl. Istaknuta je i želja predstavnika ove kompanije da uzmu učešće na tradicionalnoj poljoprivrednoj izložbi u Cazinu.

Na kraju sastanka dogovoreni su planovi za dalju suradnju i formirana je zajednička radna skupina za izradu prijedloga strategije razvoja poljoprivrede općine Cazin u koju će svakako biti uključeni i sami proizvođači.

Načelnik Ogršević je istaknuo zadovoljstvo rezultatima ovog sastanka i inicijative za strateški pristup u rješavanju problema na ovom polju i potrebi ulaganja u djelatnosti koje su ekonomski opravdane i razvojno poticajne za naše područje.



Boračka udruženja na sastanku kod načelnika

Općinski načelnik sastao se sa predstavnicima boračkih organizacija koje egzistiraju na području naše općine. U uvodnom dijelu razgovora načelnik Ogřešević poentirao je četiri prioriteta koja se odnose na ovu populaciju:

1. nastavak implementacije Zakona o dopunskim pravima boraca
2. nastavak pružanja finansijske pomoći za rad ovih udruženja
3. stambeno zbrinjavanje boračkih populacija
4. nastavak obilježavanja najznačajnijih datuma odbrambeno-oslobodilačkog rata

Predstavnik Organizacije RVI-a Razim Macanović istakao je zadovoljstvo suradnjom sa općinskim organom uprave i općinskim načelnikom. Predložio je da se izvrši procentualno uvođenje stavke u bužetu za ovu populaciju koja bi bila ravnomjerno raspoređena na sva udruženja.

Ispred "Udruženja cazinskih brigada" načelniku i prisutnima obratio se Mirsad Kaljiković, tražeći uspostavljenje koordinacije između postojećih udruženja u pravcu njihovog efikasnijeg djelovanja za prava svih kategorija boraca.

Esad Begić, dobitnik najvišeg ratnog priznanja "Zlatni ljiljan" i predsjednik istoimenog udruženja, izrazio je zadovoljstvo suradnjom sa općinskim načelnikom i aktivnostima koje je ovo udruženje realiziralo u protekloj godini.

Gospodin Damir Topić, ispred Udruženja PTSP-a, kao jednog od novih udruženja na prostoru naše općine, iznio je niz planiranih aktivnosti za naredni period, stavljajući naglasak na organiziranje terapijskih grupa za pomoć i samopomoć. Problem postoji u nedostatku prostorija, a načelnik Ogřešević obećao je da će u okviru svojih mogućnosti pokušati pronaći rješenje i za to.

Udruženje demobilisanih boraca sa svojih 2.100 članova aktivno je radilo na projektima zapošljavanja, ali i prekvalifikacije članova radi povećanja mogućnosti daljeg zapošljavanja, rješavanja stambenih problema članova, a sve te aktivnosti planiraju nastaviti i u narednom periodu, istakao je gospodin Nežad Malić, predsjednik ovog udruženja.

Patriotska liga općine Cazin, sa gospodinom Hasom Kovačevićem na čelu, predlaže osnivanje koordinacionog odbora između svih postojećih udruženja, kako bi se efikasnije planirale aktivnosti i raspoređivala sredstva.

Ovom sastanku prisustvovali su i Remzo Čaušević, predsjednik Jedinственe organizacije boraca i predsjednik RVI-amputiraca Dejan Samardžić, koji su sa aspekta članova svojih udruženja iznijeli određene planove za naredni period i zatražili podršku u njihovoj realizaciji.

Načelnik općine ovaj sastanak završio riječima podrške i pohvale za rad svih ovih udruženja, ističući želju i potrebu za kontinuiranom komunikacijom i suradnjom na polju zaštite interesa i prava boraca i njihovih porodica.

Načelnik sa predstavnicima SS Cazin

U kabinetu općinskog načelnika održan je sastanak sa predstavnicima Sportskog saveza općine Cazin. Sastanku je, pored predsjednika SS Cazin Emira Dautovića, prisustvovalo i nekoliko članova IO SS.

Uz pohvale na značajnim unapređenjima u finansijskom i organizacijskom smislu, općinski načelnik Nermin Ogřešević naglasio je da treba uraditi analizu postojećeg stanja i definirati planove za budućnost. Posebnu pažnju treba posvetiti školskom uzrastu i uz dodatne aktivnosti i uključivanje nastavnika i profesora tjelesnog i zdravstvenog odgoja pokušati omasoviti ovakav vid angažmana mladih ljudi, pružajući im stimulaciju i podršku u okviru postojećih mogućnosti. Također treba vrednovati rezultate i usvojiti kriterije za raspodjelu sredstava na pravednim osnovama.

Emir Dautović je naglasio da, i pored niza poboljšanja na ovom polju, još ima dosta prostora za unapređenje sportskog života i ambijenta naše općine.

Značajna promocija naše općine urađena je i kroz organizaciju niza takmičenja međunarodnog i državnog karaktera. Pored niza gostovanja reprezentacija raznih nivoa, organiziran je i izbor sportiste godine za općinu Cazin i USK, zatim nekoliko stručnih seminara za sportske radnike, škola plivanja, brdska utrka, takmičenja za karatiste, itd. Posebno je istaknuta brdska utrka Ostrožac jer se, prema mišljenju načelnika općine, radi o velikom sportskom događaju kojeg treba još unaprijediti i obogatiti dodatnim sadržajima.

Istaknuo je da se treba raditi na unapređenju organizacije među članicama saveza, jer će programi i planovi biti kriterij za dodjelu sredstava.

Na sastanku je napravljen osvrt i na stanje u SS invalida. U tom smislu, načelnik je istakao da treba posvetiti posebnu pažnju i podršku ovim kategorijama ljudi i pružiti im svu potrebnu pomoć u njihovim sportskim aktivnostima.

UDRUŽENJE „SRCE CAZINA“

Udruženje „Srce Cazina“ nastalo je u martu 2007. godine kao produkt zajedničkih humanitarnih akcija Cazinjana koji žive i rade u Švicarskoj, Radio-televizije Cazin, Općinskog saveza za sport i rekreaciju invalida, te Općine Cazin. Ideja o formiranju fondacije, koja bi se u prvom redu bavila prikupljanjem novčanih sredstava namijenjenih socijalno ugroženim porodicama, ubrzo je prerasla u projekat koji ima još jedan važan cilj - održavanje veza sa cazinskom dijasporom.

Tokom prošle godine, najviše zahvaljujući koncertu koji se svake godine održava u švicarskom gradu Sissachu, Udruženje „Srce Cazina“ imalo je priliku pružiti pomoć mnogima. Bajramski paketi sa novom odjećom i obucom za djecu bez roditeljskog staranja u Centru „Duga“, akcija su koja polako, ali sigurno, prelazi u tradiciju. Mališani su i ovog puta, dan uoči velikog praznika, dobili poklone kojima su se veoma obradovali. Po riječima direktora „Duge“ Admira Lješčanina, jedina nova garderoba koju ova djeca dobijaju jeste ona koju za Bajram dobiju od „Srca Cazina“.

Udruženje je također pomoglo dogradnju kuća dvojici

bivših pripadnika Armije BiH koji su teško oboljeli i nalaze se na rubu egzistencije. Almi Bajramović, kćerki poginulog borca, plaćeno je banjsko liječenje, a veći dio sredstava doniran je Udruženju oboljelih od malignih bolesti Općine Cazin, koje je na taj način tokom godine pružalo pomoć svojim članovima. Udruženju roditelja djece i mladih s posebnim potrebama „I naša djeca su djeca“, „Srce Cazina“ omogućilo je ljetovanje u kampu u Zaostrogu. Bilo je ovo prvo organizirano ljetovanje mladih i djece s posebnim potrebama, a u narednom periodu ono će biti također jedna tradicionalnih akcija „Srca Cazina“. Članovi ovog Udruženja su se u 2008. godini pridružili i akciji za liječenje Arnele Ijubijankić, a u saradnji sa OO Crvenog križa i MDD „Merhamet“ tokom Ramazana su obezbijedeni i paketi sa prehrambenim artiklima za socijalno najugroženije porodice.

U Sissachu je, 7. februara 2009. godine, održan novi koncert čiji je sav prihod namijenjen radu „Srca Cazina“. Tokom 2009. godine ovo će udruženje nastaviti tradiciju humanosti, djelujući preko postojećih humanitarnih organizacija i socijalnih institucija i pružajući pomoć tamo gdje je najpotrebnija.

Proглаšen budžet općine Cazin

Na osnovu Zakona o principima lokalne samouprave (član 19. stav 3.), općinski načelnik je 1. aprila proglasio budžet općine Cazin. Pravni osnov za ovakav potez nastao je nakon isteka 90 dana roka u kojem je ovaj dokument trebalo da usvoji općinsko vijeće, a opravdanost leži u potrebi da se građanima naše općine omogući izlazak iz teško podnošljive finansijske blokade.

Međutim, važno je naglasiti da se Općina Cazin i dalje nalazi u stabilnoj ekonomskoj situaciji, što je isključivo rezultat dobrog planiranja i analiziranja u protekle četiri godine. To praktično znači da od danas Općina Cazin nastavlja svoje funkcionisanje u punom kapacitetu. Nastavlja se isplata sredstava i

grantova budžetskim korisnicima, kao i mnogobrojna izdvajanja za planirane infrastrukturne projekte na području naše općine.

Ovogodišnji budžet predviđa značajna povećanja stavki, u pojedinim segmentima čak i stopostotno, što znači ekspanziju rasta i razvoja naše općine u gotovo svim područjima. U odnosu na proteklu godinu došlo je do povećanja sredstava koja se izdvajaju u socijalne svrhe za koje ovaj budžet omogućuje 1.596.000 KM. Grant za razvoj poljoprivrede u ovoj godini je udvostručuen. Izdvajanjem 400.000 KM za poticaje iskazuju se iskrena briga i interes za poljoprivredu kao generator razvoja ekonomije na ovim prostorima. Značajna sredstva ove godine će biti uložena i u kapitalne projekte, sportske klubove, omladinske projekte i značajne kulturne manifestacije.

Sve prethodno navedeno i još mnogo toga, zahtijeva predan i marljiv rad u implementaciji planiranih aktivnosti i projekata, koje pretenduju da učine našu općinu primjerom ekonomskog prosperiteta i sređine ugodne za formiranje života i biznisa.

Potpisivanje ugovora za nabavku novog vatrogasnog vozila



U općini Cazin izvršena je smotra općinske Vatrogasne jedinice povodom potpisivanja ugovora o kupovini kombinovanog vatrogasnog vozila za gašenje požara vodom i pjenom, koji su potpisali općina Cazin i predstavnici Ziegler d.o.o. iz Zagreba. "U sklopu naših nastojanja za modernizacijom naše općine u svim segmentima i praćenja tehničkog napretka u svijetu, mi smo se opredijelili da idemo u nabavku novog vatrogasnog vozila koje će Općina financirati u stopostotnom iznosu. Tako ćemo biti jedna od rijetkih općina u državi koja će doći u posjed novog vatrogasnog vozila. Sada će se i vatrogasci i građani osjećati daleko sigurnije. Treba reći, da mi, i pored ovoga, stalno nastojimo da poboljšamo opremljenost naše Vatrogasne jedinice, a sve u cilju zaštite i ljudi i imovine", istakao je gospodin Ogřešević. Tehničkom revizijom utvrđeno je da je najmlade

vozilo staro više od 30 godina, što je ovu jedinicu činilo nespornom za intervencije na lako zapaljivim objektima. Nabavkom ove vrste vozila jedinica se oprema za gašenje svih vrsta požara.

Vrijednost ovog vozila, sa kapacitetom od 5.000 l vode i 500 l pjene, iznosi 432.043,20 KM, a rok isporuke je ne duži od 10 mjeseci od dana potpisivanja ugovora.

Nakon raporta komandira općinske Vatrogasne jedinice smotru su izvršili načelnik općine Nermin Ogřešević i pomoćnik načelnika Službe za civilnu i protivpožarnu zaštitu Said Mujić.

Po završetku smotre i obraćanja načelnika općine, vatrogasci su izveli pokaznu vježbu, demonstrirajući spremnost i uvježbanost.



Smjene u cazinskoj **LOT** kući

Načelnik općine gospodin Ogrješević primio je u svom kabinetu bivšeg zapovjednika Tima za vezu i osmatranje EUFOR-a Mugura Ciobicu i njegovu zamjenu, kapetana Danijela Leontea.

Gospodin Ciobica oprostio se od načelnika

Ogrješevića, ističući iznimno zadovoljstvo zbog uspješne suradnje i zahvaljujući na velikom gostoprimstvu koje je imao priliku osjetiti tokom svog boravka u našoj općini.

Načelnik Ogrješević je u znak uspomene na ove krajeve poklonio gospodinu Ciobici Monografiju BiH i poželio dobrodošlicu novom zapovjedniku, izražavajući nadu u nastavak uspješne komunikacije i saradnje između stanovnika LOT kuće i općine Cazin.

Estradne zvijezde brinu o svojim sugrađanima

Da se rodni kraj nikad ne zaboravlja svjedoči i akcija cazinske zvijezde Osmana Hadžića, koji je zajedno sa Općinom Cazin i njenim Sportskim savezom pokrovitelj putovanja 12 talentovanih dječaka-nogometaša, uzrasta od 13 godina, na dvije probne utakmice u njemački VfB Stuttgart. Tamo će se mališani susresti sa svojim vršnjacima iz ovog kluba i ujedno upriličiti oproštaj svom timskom kolegi Hamzi Čatakoviću, kome je već obezbijedeno fudbalsko školovanje u Stuttgartu.

Ovom humanitarnom događaju načelnik Ogrješević je dao punu podršku i pozdravio inicijativu koja ima za cilj sportsko usavršavanje naših mališana, jer je namjera općine Cazin u narednom periodu razvijati sportske potencijale i ulagati u sport i sportske događaje.

Sistem LOT kuća predstavlja "oči i uši" EUFOR-a na terenu, te doprinosi održavanju sigurnog i stabilnog okruženja i omogućava međunarodnoj zajednici da pomogne zemlji da korača naprijed prema uspješnoj budućnosti. Kako je saopćeno iz EUFOR-a, mreža EUFOR-ovih LOT kuća funkcioniše u okviru sistema od pet regionalnih koordinacijskih centara širom zemlje. Svaki LOT tim, kao i regionalni centar u BiH popunjava se pripadnicima jedne od zemalja učesnica EUFOR-a, a cazinsku LOT kuću popunjavaju pripadnici koji dolaze iz Rumunije.



Toplifikacija općine Cazin

U kabinetu načelnika općine održana je prezentacija projekta mogućnosti toplifikacije općine Cazin. Projekat su prezentirali predstavnici firmi "Eko toplane" iz Gračanice, "PDC" i "Enpro" iz Grödiga i kompanije "Progressys", čije je sjedište u Linzu.

Radi se o projektu koji zagovara korištenje alternativne energije za grijanje, u ovom slučaju biomasi. Važnost ovakvih inicijativa ogleda se u mogućnosti iskorištavanja prirodnih resursa i zatvaranju kruga investiranja u vlastitu privredu i njene potencijale. Biomasa je zapravo energent koji se dobija iz flore, te se procesom sagorijevanja izdvaja prirodno akumulirana energija koja se može iskoristiti u različite svrhe. Najveći broj projekata u ovoj oblasti alternativne energije zasniva se na biomasi od drveta. U poređenju sa drugim energentima, a uzimajući u obzir sadašnje cijene, ušteda iznosi preko 80%. Drvni otpadi okoline dovoljni su da snabdijevaju toplanu i time omogućue neovisnost od internacionalnih cijena energenata.



Načelnik Ogřešević je izrazio veliko interesovanje Općine za ovakve i slične inicijative, naglašavajući ekonomsku situaciju ovih područja koja će svakako usloviti realizaciju ovakvih projekata. On je također istakao važnost jasnog i preciznog definiranja pravnog i ekonomskog okvira koji će zaštititi građane općine od bilo kakve vrste monopola u ovoj oblasti. Na kraju je objasnio proces donošenja ovakvih odluka, naglašavajući činjenicu da će građanima biti ostavljena mogućnost da izaberu vrstu i način rješavanja ovog pitanja. Tačnije, organiziraće se ankete, rasprave i svi vidovi informisanja građana u pogledu njihovog izbora između plinifikacije i biomase.



Prednosti biomase u privredi su višestruke:

*neovisnost od drugih
resursa,
finansijska ekonomičnost,
ekološka prednost,
poljoprivredni razvoj,
razvoj šumarstva,
nova radna mjesta i sl.*

Asocijacija komunalnih i vodovodnih preduzeća unsko-sanskog sliva

U Bihaću je 30.01.2009. godine održana prva sjednica Asocijacije komunalnih i vodovodnih preduzeća unsko-sanskog sliva. Asocijacija bi trebala da doprinese institucionalnom jačanju javnih komunalnih i vodovodnih preduzeća, stavljajući poseban akcenat na poboljšanje kvalitete usluga prema građanima, kao i konkurentnost i atraktivnost komunalnog sektora na području cijele regije, u svrhu promocije prema domaćim i međunarodnim finansijskim institucijama.

Nakon svih prezentacija, diskusija i razmatranja zaključeno je slijedeće:

- Da se Asocijacija komunalaca unsko-sanskog sliva uspostavi i organizira prema zajedničkom prijedlogu, odnosno na neformalan način i da probni rad traje šest mjeseci, nakon čega će se razmotriti i analizirati stečena iskustva i nakon toga predložiti budući način organizacije i rada Asocijacije komunalnih i vodovodnih preduzeća unsko-sanskog sliva
- Da se uspostave neformalna radna tijela na period od šest mjeseci i još jednom prihvate jednoglasno imenovanja članova neformalnih tijela
- Da Predstavnicima JP "Vodovod" d.o.o. Bihać urade izvod iz zapisnika s druge sjednice (sastanka) Asocijacije komunalnih i vodovodnih preduzeća unsko-

sanskog sliva i dostave ga svim članicama (kao i onima koji nisu bili prisutni na drugoj sjednici), a predstavnici Udruženja "Una-Sana" pomoći će da se radovi radnih grupa obrade tabelarno, kako bi se mogli priložiti uz izvod iz zapisnika.

- Da se neformalno predsjedništvo obavezuje da će naknadno ažurirati i završiti godišnji plan i program rada Asocijacije komunalaca.
- Da predstavnici javnog preduzeća "Vodovod" AD Prijedor razmotre pripremu i organizaciju narednog sastanka u prvom polovini mjeseca marta na temu međusobnih odnosa javnih preduzeća i njihovih osnivača. Udruženje "Una-Sana" će kroz projekat "GOV-WADE" u suradnji sa predstavnicima općine Prijedor i uključivanjem tima koji radi na unapređenju propisa i njihovog provođenja iz oblasti voda, zaštite okoliša i komunalnih djelatnosti pomoći u pripremi i organizaciji pomenutog tematskog sastanka.

Na kraju sastanka dogovoren je plan i raspored narednih susreta Asocijacije u 2009. godini sa odabranim temama prezentacija, koje će se oslanjati na svakodnevnu problematiku ovih preduzeća u težnji da se unaprijede usluge i u ovoj oblasti.

Suradnja javnih komunalnih preduzeća općina sliva rijeke Une

U Bosanskoj Krupi je 2. i 3. aprila 2009. godine održan Okrugli sto direktora javnih vodovodnih i komunalnih preduzeća s ciljem da se kroz praktične primjere upoznaju sa bržim i integritetnim menadžmentom, koji je uspješno implementiran u Švicarskoj i drugim evropskim zemljama.

Na ovom je susretu napravljena detaljna analiza trenutnog poslovanja javnih komunalnih preduzeća i kvalitete usluga koje ova preduzeća osiguravaju svojim korisnicima. Također su identificirani ključni potencijali za unapređenja u

ovoj oblasti, a odnose se na slijedeće aktivnosti:

- kreirati podržavajući pravni okvir kroz pripremu i usvajanje novih ili izmjenu i dopunu postojećih zakona i podzakonskih akata,
- uspostaviti sporazumni odnos između općina i javnih vodovodnih i komunalnih preduzeća,
- ojačati izgradnju i kapacitete osoblja ovih preduzeća, itd.

Cilj ovakvih i sličnih mjera jeste unapređenje usluga, povećanje zadovoljstva građana, jačanje imidža općine i povećanje stepena atraktivnosti općine za nova investiranja.

Turizam – jedan od faktora razvoja općine



Turizam kojeg karakterizira stručno osmišljen i usmjeren razvoj može značajno doprinijeti ekonomskom razvoju određene geografske cjeline. Takav turizam, prije svega, trebao bi biti baziran na održivom korištenju prirodnih i kulturno-historijskih potencijala, stvarajući okruženje privlačno za investitore.

Kada govorimo o općini Cazin, turizam u poslijeratnom periodu nije doživio značajan razvoj i uglavnom se može svesti na tzv. kongresni turizam (održavanje seminara, naučnih skupova i dr.). Samo neki od mnogobrojnih razloga za to su nejasna strategija Turističke zajednice Unsko-sanskog kantona za svaku od 8 kantonalnih općina, nepostojanje turističkog ureda u općini, te slabo razvijena svijest građana o velikom kulturnom značaju onoga što im se nalazi „pred nosom“, a koji bi, kroz svakodnevne poslovne ili bilo koje druge kontakte, također mogli biti značajni promotori svoje općine.

Velika prilika u budućnosti nazire se u razvoju ekoturizma, koji je sve traženiji u razvijenim, „preindustrijaliziranim“ sredinama u cijelom svijetu, a za koji područja kao što je naše imaju odlične predispozicije.

Najveći trošak za turizam je marketing, pogotovo kvalitetan i stručan, zbog čega se u našoj općini još uvijek ne može očekivati zadovoljavajuće visoko investiranje u njega, ali se, s druge strane, prema kulturno-historijskim znamenitostima svi možemo početi odnositi kao prema zajedničkom dobru od

kojeg ćemo u dogledno vrijeme imati višestruke koristi. Upravo zato potrebno je iskoristiti svaku priliku da se građani educiraju o značaju domaćih kulturno-historijskih znamenitosti, te da se one predstavljaju što većem broju ljudi.

Cazin – kroz historiju

Područje Cazina, o čemu svjedoče brojni ostaci predmeta od kosti, kamena, ilovače, bronce i željeza, pronađeni u Gradini, Selištu, Čungaru i drugim dijelovima općine, bilo je naseljeno još u predhistoriji.

Analogno dokazima da je Bihać i njegovu širu okolinu u 8.stoljeću naselilo ilirsko pleme Japoda, pretpostavka je da je ono bilo naseljeno i na području naše općine. Rimljani su ovamo došli još početkom 1.stoljeća, s obzirom da je glavna putna komunikacija, koja je povezivala područje Dalmacije i Podunavlja, prolazila upravo Pounjem.

Tek u srednjem vijeku područje današnjeg Cazina je naseljeno u pravom smislu riječi, kao dio Hrvatske. 1522. godine Cazin je postao sjedištem Kninske biskupije, da bi ga 1576. nekoliko decenija poslije, zamijenili su Turci koji su Cazin osvojili 1576.god. Konačnu okupaciju Bosne i Hercegovine Monarhija Austro-Ugarske okončala je upravo u ovom kraju, donoseći sa sobom velike promjene.

Krajem 19. stoljeća Cazin je poprimio odlike grada, te postaje centar Cazinskog kotara, koji je obuhvatao područje Cazina i Velike Kladuše.

Ostrožac

Iako se, prema nekim izvorima, postojanje Ostrožca spominje još na prijelazu 4. na 5. stoljeće prije nove ere, kao zvanična odrednica se uzima godina 1286., kada su njime vladali blagajski knezovi Babovići (knezovi Ostroški).

Ipak, sami Stari grad Ostrožac se vezuje za tri vremenska razdoblja, s obzirom da u sebi ima više vremenskih slojeva, zbog čega i jeste vrijedan dio našeg zajedničkog kulturnog i historijskog naslijeđa. Nakon restauracije utvrde i izgradnje dvorca, 1902. godine Lothar von Berks je doselio na Ostrožac, odakle je, u ime dinastije Habsburga, upravljao Bihaćkim okrugom.

Više od sedam stoljeća Ostrožac nad Unom imao je dosta burnih događaja i bio najčešće u središtu značajnih zbivanja. Smjenjivali su se i gospodari nad njim i u njemu. Na jednoj glagoljskoj listini iz 1403. godine koja je kupoprodajni ugovor o kupovini jedne „palace“ (kuće) sačuvan je pečat okrugla oblika u čijem središtu je bila kula s ulazom, pokraj nje osmokraka zvijezda i polumjesec, a oko ovog crteža ispisan je latinski naziv „s comunitatis Ostrocensis“.

Polovinom 16. stoljeća Ostrožac je dobio „krajišku posadu“, ali je Ferhatbeg ovu jaku utvrdi osvojio 1577. godine i držao kratkotrajno pošto je general Kevenhüller osvojio Ostrožac. Ipak, od 1579. godine Ostrožac je u posjedu Turaka. Tvrđim gradom

Ostrožcem su kao kapetani upravljali, skoro, 300 godina, članovi porodice Beširević, sve dok kapetanije nisu ukinute (1836).

Obitelj Beširević je, zbog tako duga gospodarenja Ostrožcem, dobila nasljedno pravo na stari grad i utvrdi. Po toj osnovi je Mehmedbeg Beširević ostrožacki grad prodao Lotharu von Berksu, koji je u razdoblju od 1896. do 1905. bio načelnik Bihaćkog okruga.

Lothar von Berks je restaurirao stari grad Ostrožac i u njemu (na južnom dijelu) podigao svoj dvorac u koji se nastanio 1902. godine nakon što je iz doline Une do utvrde Ostrožac načinjen serpentiniski put i most preko Une.

U vrijeme II svjetskog rata, unutar zidina je u jednom periodu bio smješten i Vrhovni štab NOB-a, na čijem čelu je bio Josip Broz. Za vrijeme boravka u zamku napravljen je i plan za održavanje Drugog zasjedanja AVNOJ-a u Bihaću, jednog od najvažnijih događaja antifašističke borbe u II svjetskom ratu.

Od tada je Ostrožac za mnogobrojne znatizeljene promatrače bio kao grad iz bajke. Oni koji su ga imali prilike razgledati do početka II svjetskog rata ostavili su svjedočanstvo: „Dvorac je raskošno uređen. Odaje su prepune umjetnički izrađenih predmeta. Tu su saloni za muziciranje i biblioteka s brojnim knjigama, umjetničke slike-portreti članova porodice, spavaonice veće i manje, hodnici sa lovačkim trofeima, pokućstvo i namještaj sa duborezima i intarzijom“ i dr.



Cazin u posjeti gradu Rijeci

Načelnik općine Nermin Ogrešević i njegovi saradnici boravili su 11. marta u posjeti gradu Rijeci gdje su se susreli sa gradonačelnikom Vojkom Obersnelom. Sastanak je upriličen s ciljem iniciranja suradnje i razmjene iskustava na polju komunalne infrastrukture, kulture, sporta i poduzetništva.

Gradonačelnik Obersnel izrazio je dobrodošlicu gostima i zajedno sa svojim pročelnicima za kulturu i komunalnu infrastrukturu predstavio razvoj grada Rijeke u posljednjih deset godina i načina na koji Rijeke rješava glavne probleme i potrebe svog stanovništva. Od velikog značaja su svakako informacije i konkretna uputstva u realizaciji projekata, kao što su izgradnja kanalizacionog sistema, rješavanje problema gradskog parkiranja, podupiranje poduzetništva u okviru poslovnih inkubatora Regionalne razvojne agencije Porin i sl.

Načelnik Ogrešević je objasnio osnovne karakteristike općine Cazin i njenog poslijeratnog razvoja, izražavajući zainteresiranost za razmjenu iskustava u primjerima dobre prakse iz našeg bližeg okruženja, uspostavljajući tako temeljne mostove prekogranične saradnje.



U okviru ove posjete upriličen je i susret sa predstavnicima Islamske zajednice Rijeke uz namjeru učvršćivanja prijateljskih veza, kulturne razmjene i suradnje. Na ovom druženju je prezentiran i projekat izgradnje Islamskog centra u Rijeci koji je općina Cazin podržala još u fazi izrade projektne dokumentacije. Značaj ovog objekta je u njegovoj multifunktionalnosti i višestrukoj namjeni, koja će povezivati ljude iz okolnih zemalja u realizaciji mnogobrojnih planova i aktivnosti saradnje, prvenstveno na kulturnom planu.



Srednjoročna revizija projekta **GOV-WADE**

U Bihaću je, 4. decembra 2008. godine, održana radionica "Srednjoročne revizije projekta GOV-WADE" na kojoj su učestvovali i predstavnici općine Cazin i direktori JP-a i JU-a iz Cazina.

Projekt "GOV-WADE" (Governance Project in Municipal Water and Environmental Development) je "Projekt dobre uprave u oblasti voda i zaštite okoliša" usmjeren na poboljšanje upravljanja u oblasti voda i okolišne sanitaracije, s tim da je težište samog projekta na cjelokupnom unapređenju prakse dobre uprave u općinama sliva rijeke Une. Implementacija Projekta "GOV-WADE" povjerena je općinama-učesnicama projekta, što ovaj projekt značajno razlikuje od prethodnih.

Projektom je obuhvaćeno 17 općina unsko-sanskog regiona: Bosanska Krupa, Cazin, Bužim, Velika Kladuša, Bihać, Ključ, Sanski Most, Bosanski Petrovac i Drvar, iz Federacije BiH; Ribnik, Bosanska Dubica/Kozarska Dubica, Bosanski Novi/Novi Grad, Bosanska Kostajnica/Kostajnica, Prijedor, Petrovac (Drinić), Krupa na Uni i Oštra Luka, iz Republike Srpske.

Srednjoročna revizija projekta uslijedila je nakon nekoliko uspješnih faza ovog projekta kako bi se: povećalo razumijevanje i promovirali ciljevi, pristupi i potencijalne koristi za učesnike, prikupili dodatni inputi i prijedlozi za buduće jačanje ovog projekta.

Na ovoj radionici je, između ostalog, istaknut generalni cilj projekta koji se ogleda u unapređenju kapaciteta lokalnih vlasti i civilnog društva na općinskom nivou za poboljšanje prakse dobre uprave i upravljanja u oblasti voda i zaštite okoliša, kao i osiguranje zalaganja za bolje okruženje na višim nivoima.

Srednjoročna revizija pokazala je velika postignuća u oblasti dobre uprave voda i zaštite okoliša u svim općinama koje obuhvata. Prije svega, došlo je do unapređenja propisa (legislative), kvaliteta usluga je podignuta na viši nivo, pojačana je transparentnost u radu općina većim angažmanom civilnog društva u planiranju i odlučivanju, 17 općina je formiralo Platformu unsko-sanskog sliva, ojačani su kapaciteti općina u sektoru za međusobnu saradnju i sl.

Projekt je podržan od Švicarske agencije za razvoj i saradnju (SDC), a njegovo provođenje potpomaže Udruženje za zaštitu i unapređenje čovjekove okoline "Una-Sana" iz Bihaća.

Načelnik općine Cazin u posjeti općini Bosanski Petrovac



Načelnik općine g. Ogršević 14. januara je boravio sa svojim saradnicima u radnoj posjeti općini Bosanski Petrovac. Bez obzira na mnogobrojne razlike u broju stanovnika i disproportiji teritorije na kojoj se prostiru, ove dvije općine imaju i mnogo zajedničkih potreba i interesa. Razgovarano je o mnogobrojnim problemima ovih općina, ali i mogućnostima saradnje na raznim poljima.

Pomoćnici načelnika Hajdera ukratko su prezentirali stanje u općini Bosanski Petrovac iz oblasti prostornog uređenja, finansijskog stanja općine, administrativnog uređenja, postratnim obnovama i napretku općine. Gostima iz Cazina prezentiran je i Regulatorni plan turističke destinacije na Oštrelju, industrijske zone Bosanskog Petrovca, kao i niz drugih projekata koji bi mogli biti zanimljivi privatnim poduzetnicima iz općine Cazin.

Načelnik Hajder je naglasio da postoji sve veći interes za ulaganje u ovu općinu, naročito kada je u pitanju proizvodnja zdrave hrane. Pored toga, postoje i određene najave iz ASA-Preventa za ulaganje u ovu općinu, čime bi bila osigurana i nova radna mjesta.

Radna posjeta zaokružena je prezentacijom predstavnika općine Cazin o privrednoj, društvenoj i kulturnoj situaciji u Cazinu. Dogovoren je i zajednički nastup ove dvije općine prema kantonalnim i federalnim nivoima vlasti u ostvarivanju određenih planova i unapređenja životnog standarda stanovnika.

Ova posjeta je polučila i ideju o organiziranju sastanka svih načelnika USK u što skorijem vremenu, što bi zapravo trebalo da bude inicijativa u pravcu kontinuiranog savjetovanja i dogovaranja između predstavnika svih općina našeg kantona.

Općina Cazin jedna od partnerskih općina u Projektu integrisanog lokalnog razvoja

U petak, 24. aprila 2009. godine, načelnik Ogřešević je u Sarajevu potpisao Memorandum o razumijevanju s partnerskim općinama u UNDP Projektu integrisanog lokalnog razvoja. Općina Cazin u ovom projektu ima status pridružene općine, koja je prepoznata kao primjer organiziranja odgovarajućih administrativnih struktura potrebnih za djelotvorno odgovaranje razvojnim trendovima i izazovima. Općine sa ovim statusom bi sa relativno ograničenom spoljnom podrškom i ciljanim jačanjem kapaciteta za primjenu standardizirane metodologije u planiranju lokalnog



razvoja mogle predstavljati uzoran primjer drugim općinama u primjeni integriranog i participativnog pristupa planiranju lokalnog razvoja.

Projekat Integrisanog lokalnog razvoja je zajednička inicijativa SDC-a i UNDP-a koju provodi UNDP u partnerstvu s entitetskim savezima općina/opština i gradova, Ministarstvom za ljudska prava i izbjeglice BiH, Ministarstvom uprave i lokalne samouprave RS i Ministarstvom pravde FBiH. Financijsku podršku projektu zajednički osiguravaju SDC i UNDP.

Projekat Integrisanog lokalnog razvoja, u kojem učestvuju još 23 općine, ima za cilj osigurati modernizaciju i profesionalizaciju planiranja lokalnog razvoja u Bosni i Hercegovini, kroz izradu i primjenu standardiziranog pristupa integrisanom i inkluzivnom lokalnom razvoju na temelju postojećih iskustava i dobrih praksi u BiH i drugim evropskim zemaljama.

Okrugli stol načelnika općina sliva rijeke Une

U svrhu istraživanja potencijala za unapređenje općinske prakse u upravljanju, naročito u pogledu voda i zaštite okoliša upriličen je okrugli stol načelnika općina sliva rijeke Une sa načelnikom švicarske općine Wittenbach Albertom Etterom. Susret načelnika je organiziralo Udruženje za zaštitu i unapređenje čovjekove okoline "Una-Sana" Bihac u okviru projekta dobre uprave u oblasti voda i zaštite okoliša GOV-WADE.

Ciljevi ovog susreta su: razmjena iskustava sa gradonačelnikom Wittenbacha, korištenje prikupljenih iskustava i znanja među načelnicima u slivu rijeke Une, jačanje suradnje u slivu rijeke Une po pitanjima od zajedničkog interesa, istraživanje mogućnosti i jačanje kapaciteta atraktivnosti u međunarodnoj suradnji kroz otvorenost, učinkovitost i zajednički nastup.



Ovom sastanku jučer je prisustvovao i načelnik Ogřešević, ističući značaj međusobne suradnje ovih općina radi uspostavljanja prepoznatljivog sistema kvaliteta u oblasti zaštite životne sredine i očuvanja najvećeg blaga ovih prostora - rijeke Une i njenih potencijala. Gospodin Ogřešević je, zajedno sa načelnikom Etterom, istu večer gostovao u emisiji RTVUSK posvećenoj ovoj tematici.

Delegacija grada Opatije u Cazinu

Gradonačelnik Opatije dr. Amir Muzur sa svojim saradnicima boravio je 11. maja 2009. godine u posjeti općini Cazin. Riječ je o uzvratnoj posjeti, koja je uslijedila nakon inicijalnog sastanka predstavnika općine Cazin u Opatiji, u aprilu ove godine. Razlog brzo uspostavljene suradnje i nastavka razgovora leži u činjenici zblizavanja programa i projekata ova dva grada.



“Činjenica je da smo teritorijalno upućeni jedni na druge, da imamo zajedničke interese i mogućnosti za apliciranje projektnih ideja prema fondovima EU, naročito kada su u pitanju turizam i suradnja u obrazovanju, što je svakako veliki prioritet cijele Europe”, riječi su gospodina Muzura kojima je započeo susret dvije delegacije.

Načelnik Ogřešević je, nakon kraće prezentacije u općini Cazin, njenim potencijalima i karakteristikama kroz historijski razvoj, predložio nacrt Sporazuma koji će u narednom periodu biti predmet razmatranja i usaglašavanja grada Opatije i općine Cazin. “Radi se o sporazumu koji će omogućiti suradnju u oblasti obrazovanja, razmjene učenika i profesora, kao i razmjenu iskustava u pravcu izrade Akcionog plana turističkog razvoja općine Cazin”, naglasio je načelnik Ogřešević.

Ravnateljica Hotelijersko-turističke škole u Opatiji gospođa Ksenija Beljan održala je kraću prezentaciju kojom je nastojala upoznati prisutne sa situacijom u njihovoj školi, razvoju, vannastavnim aktivnostima i mogućnostima suradnje sa drugim školama u



okruženju. Sličnu sliku Ugostiteljske škole u Opatiji, izložio je ravnatelj gospodin Damjan Miletić, nakon čega su se otvorila pitanja suradnje na više razina.

Gostima se svidjela atmosfera ubrzanog razvoja općine Cazin i slika njenih prirodnih i turističkih potencijala koje su uspjeli vidjeti tokom kraćeg obilaska Starog grada Ostrožca i jednog dijela rijeke Une.





Memorandum o razumijevanju

U našoj općini je, 20. novembra 2008. godine, potpisan Memorandum o razumijevanju o uspostavljanju centra za izdavanje dozvola u općini Cazin. Memorandum je potpisan između Općine Cazin i Kantonalnog ministarstva za građenje, prostorno uređenje i zaštitu okoline Bihać, Kantonalne direkcije za ceste Bihać, "Elektrodistribucije" Bihać, BH Telecom - Direkcija Bihać, JKP "Vodovod" Cazin, JKP "Čistoća" Cazin i JU Komunalno-stambeni fond Cazin.

Kako je naglasio načelnik općine, ovim memorandumom reguliše se realizacija zajedničkih aktivnosti u cilju uspostavljanja centra za izdavanje dozvola pri Centru za usluge građanima općine Cazin.

Opći cilj uspostavljanja Centra za izdavanje dozvola je da obezbjeđuje efikasnije, ekonomičnije i transparentnije procese planiranja i izdavanja dozvola u oblasti urbanizma i građenja: centralizacijom svih relevantnih informacija, planske i provedbene dokumentacije, podnošenja zahtjeva i izdavanja rješenja, kao i pristupačnost relevantne zakonske regulative na jednom mjestu.

U cilju ostvarenja kontinuiranog i koordiniranog unapređenja procesa urbanističkog planiranja i izdavanja dozvola u oblasti urbanizma i građenja, aktivnim uključivanjem svih učesnika u ovim procesima, strane će osnovati stalni savjetodavni odbor Centra, čije će operativno tijelo biti radna grupa za urbanizam, osnovana od strane Općine i članovi koje delegiraju članovi Odbora.

Osnivanje funkcionalnog centra zahtijeva provođenje zajedničkih aktivnosti svih učesnika u procesima urbanističkog planiranja i izdavanja dozvola iz oblasti urbanizma i građenja koje, između ostalog, uključuju: ažuriranje, centralizaciju i elektronsku razmjenu podataka, stalne kontakte i suradnju u procesima planiranja i postupcima izdavanja dozvola, bržu i bolju komunikaciju na planu izdavanja saglasnosti, stručnih mišljenja, tumačenja i sl.

Potpisnici ovog memoranduma izrazili su veliko zadovoljstvo ovakvom inicijativom i podržali planove na uspostavljanju bolje i efikasnije međusobne komunikacije. Želja svih prisutnih jeste da se omogućiti kvalitetnija usluga građanima i brža realizacija projekata od općeg interesa.

Radni sastanak sa privrednicima općine

Načelnik općine Cazin je, 6. novembra 2008. godine, ugostio privrednike na organiziranom radnom sastanku u Domu kulture. Svrha ovog sastanka bila je razmatranje ekonomskog razvoja i privredne situacije u našem gradu.

U svom uvodnom govoru, načelnik općine izrazio je želju da ovaj inicijalni sastanak bude trajnije kategorije i da se istinski radi na uspostavljanju bolje komunikacije i efikasnijih odnosa između općinskog organa uprave i privrednih poduzetnika. Istaknuta je obaveza rješavanja bitnih preduslova za uspješno poslovanje i stvaranje razvojne atmosfere u našoj općini, kao što su putevi, kanalizacija, vodovod, centar za pružanje usluga građanima i sl. Između ostalog, načelnik je naglasio značaj ulaganja u imidž ove općine i njenu prezentnost u granicama BiH, ali i van nje. Postoje određeni pomaci u oblasti saradnje sa raznim NVO-ima, međunarodnim organizacijama, općinama u susjednoj Republici Hrvatskoj, ali ono što je najznačajnije za podizanje kvaliteta življenja svih stanovnika općine Cazin jeste ulaganje u privredni razvoj, naročito u proizvodne kapacitete. "Bez prerađivačkih kapaciteta, tj. novih proizvodnih



pogona, nema ni stvaranja nove vrijednosti", naglasio je načelnik općine, Nermin Ogrišević.

U okviru organiziranog sastanka, gospodin Mujakić je prezentirao prostorno-plansku dokumentaciju i pozvao sve prisutne i zainteresirane da se aktivno uključe u izradu tih, za našu općinu kao jednu od najgušće naseljenih u BiH, vrlo značajnu regulativu. Prisutnima je potom objasnio sve prednosti GAP projekta, koji će građanima ove općine omogućiti zadovoljenje svih potrebe na jednom mjestu - u Centru za pružanje usluga građanima. To bi konkretno značilo uvođenje novih tehnologija u rad općinskog organa uprave, bolju organizaciju, efikasniju uslugu i bržu informaciju za sve potrebne zahtjeve.

Mr. Mehira Kapić, svoju prezentaciju bazirala je na privrednim zonama naše općine, tačnije poslovno-poduzetničke zone Slatinske bare. Prema njenom izlaganju, Služba za razvoj i poduzetništvo općine Cazin sačinila je prijedlog odluke i program izgradnje poslovno-poduzetničke zone i uputila ga na razmatranje i usvajanje općinskom vijeću što bi se trebalo naći na njihovom dnevnom redu već početkom naredne godine. Mr. Kapić objasnila je i sve poduzete aktivnosti od strane Općine, predložila sliku o trenutnom stanju, namjeni prostora i predložila određene vrste olakšica za privrednike na tom lokalitetu. Prema njenim riječima, plan Općine Cazin za naredni period je izrada programa za uspostavu zona i na drugim lokalitetima kao što su: Čoralčić, Pjanići, Polje, Mutnik, Stijena, Skokovi, itd.

Nakon izlaganja, otvorena je diskusija za sva eventualna pitanja i pojašnjenja, a prema ocjeni prisutnih sastanak je protekao u pozitivnoj atmosferi i uz vrlo uspješne razgovore.

Općinska smotra sposobnosti, znanja, stvaralaštva i sporta

Tradicionalna manifestacija takmičenja srednjih škola i ove godine se održavala u općini Cazin, a obuhvatila je literarnu i likovnu oblast, praktičnu nastavu i kulturno-umjetnički program. Ova smotra intenzivira rad na posebnim, nesvakidašnjim i znanstvenim aktivnostima učenika srednjih škola. Učenici koji ostvare najbolje rezultate predstavljaju svoju općinu na završnom kantonalnom takmičenju, koje će se održati 29. aprila u Bužimu.

U okviru ovih takmičenja svakako je neophodno naglasiti i učešće direktnih predstavnika škola u pojedinim oblastima znanja, kao što su matematika, fizika, informatika i bosanski jezik na istoj završnoj smotri.



I ove godine, smotru je podržao i otvorio općinski načelnik Nermin Ogrišević koji je ujedno i pokrovitelj ove manifestacije, ističući važnost ulaganja u obrazovanje mladih na svim poljima njihovog kulturnog, stvaralačkog i sportskog angažmana. "Podržavati ovakve manifestacije i ulagati u budućnost koja svakako ostaje na mladima, imperativ je ovog društva i naša svakodnevna obaveza", istaknuo je načelnik Ogrišević.

Takmičenje je otvoreno horskim nastupom članova Medrese Džemaludin ef. Čaušević.



Izveštaj Biroa rada općine Cazin za 2008. godinu

Programi podrške za zapošljavanje, koji se realiziraju kroz općinske biroa rada, mogu značajno utjecati na promjenu stanja zaposlenosti. Iako ih je u prošloj godini nekoliko bilo aktivno, u cazinskom biroa za zapošljavanje nisu zadovoljni zastupljenošću ovih programa, kako nam je rekao Mustafa Ružnić, stručni suradnik Biroa za zapošljavanje.

Takvi programi odnose se na određenu kategoriju stanovništva, te mogu biti vezani za starosnu dob, socijalnu kategoriju, spol, stepen invaliditeta i slično. Putem Biroa za zapošljavanje u Cazinu podršku u zapošljavanju dobilo je oko 70 lica, te se smatra da je 2008. godina bila neuspješna u tom pogledu.

Na početku godine imali smo jedan program, gdje je za cijeli Unsko-sanski kanton od strane Federacije BiH bilo prebačeno samo 418.000 KM za zapošljavanje

novih lica i otvaranje novih firmi. Četvrtinu sredstava, znači oko 105.000 KM, uspjeli smo svojim angažmanom obezbijediti za našu općinu. Do tad je 11 poslodavaca bilo podnijelo zahtjeve za sredstva u svrhu poticanja zapošljavanja novih radnika i svima je udovoljeno. Putem istog programa otvoreno je devet novih firmi. Također je bio aktualan stalni program zapošljavanja lica koja imaju više od 40 godina u okviru čega su 33 lica-poslodavca podnijela zahtjeve, a svima je također udovoljeno.

U prošloj godini aktivni su bili i Program za zapošljavanje osoba sa civilnim invaliditetom, te Program za zapošljavanje izbjeglih i raseljenih lica, ali im se, za razliku od drugih općina Unsko-sanskog kantona u kojima je ova kategorija stanovništva zastupljenija, odazvalo tek nekoliko.

Svečano obilježavanje 17. godišnjice Armije RBiH

Povodom 17. godišnjice Armije RBiH u organizaciji Koordinacije boračkih udruženja i Općine Cazin organizirano je svečano obilježavanje ovog značajnog datuma za Bosnu i Hercegovinu.



Obilježavanje je počelo okupljanjem na stadionu FK "Krajina" na kojem je prošle godine postavljena spomen-ploča kao sjećanje na prvo postrojavanje pripadnika Armije RBiH u Cazinu. U ime domaćina prisutne je pozdravio Esad Begić, a skupu se obratio i općinski načelnik Nermin Ogrišević, koji se osvrnuo na važnost ovog datuma u našoj historiji, ali i našu obavezu prema budućnosti Bosne i Hercegovine.

Kao ratni komandant 517. brigade prisutne je pozdravio Ibrahim Nadarević, a u ime Kantonalnog organizacionog odbora za obilježavanje Dana Armije čestitku je uputio Amir Avdić, ratni komandant 510. brigade.

Prigodan sat historije o nastanku i razvoju Armije BiH održao je ratni komandant 503. slavne brdske brigade g. Muhamed Hamdo Delalić.

Nakon toga nekoliko stotina prisutnih uputilo se do centralnog šehidskog obilježja da uz polaganje cvijeća i učenje fatihe odaju počast šehidima - poginulim borcima Armije RBiH.



Reforma javne uprave

Reforma javne administracije u općini Cazin jedan je od procesa za koji je potvrda o uspješnoj implementaciji došla i od same OSCE misije u Bosni i Hercegovini. Uz druge segmente, napredak je naročito vidljiv u broju riješenih predmeta građana, koji se iz godine u godinu znatno povećava.

“Moderna administracija, s obzirom na to da djeluje u okruženju koje je, u skladu s principima tržišne ekonomije, turbulentno i dinamično, mora biti spremna odgovoriti na takav ubrzani tempo, njene reakcije na zahtjeve građana moraju biti brze i efikasne, da bi pratile tempo okruženja”, objašnjava načelnik općine Nermin Ogrišević.

“Nismo radili pravilnike forme radi, što se vidi u tome da smo po starom pravilniku imali sistematiziranih radnih mjesta 141, a po novom - 127. I na taj način smo pokazali da težimo manjoj administraciji, ali efikasnijoj. S druge strane, i prema našim izvještajima u kojima pratimo 2006. i 2007. godinu, možemo reći da se efikasnost povećala, jer imamo daleko veći broj riješenih predmeta. U 2006. oko 11.500, a u 2007. - već preko 18.000 predmeta. Po tome se se vidi da je produktivnost administracije veća s manjim brojem uposlenih, što je zasigurno neoboriv argument u prilog tome da idemo u dobrom pravcu”, ističe načelnik Ogrišević

Poboljšanja u funkcioniranju općinske administracije svakako mogu primijetiti i sami građani, mada to nikako ne znači da se na procesu podizanja kvalitete pružanja usluga, a pogotovo komunikacije s građanima, ne treba još dosta raditi.

INTERVJU SA PREDSJEDNIKOM SAVJETA MZ "STIJENA"



Možete li nam reći nešto više o sebi i Vašem izboru za predsjednika MZ Stijena?

- Zovem se Kaljiković Šerif, rođen 08.10.1977. godine, u selu Stijeni, dipl.ing. drvene industrije, a izabran sam za predsjednika Savjeta MZ Stijena, na izborima u MZ 2006. godine. Kako je na istim izborima Mjesna zajednica Stijena dobila jedan vrlo kvalitetan Savjet, sa zadovoljstvom sam prihvatio da budem na njegovom čelu.

Opće karakteristike MZ Stijena?

- MZ Stijena po procjenama ima više od 7.000 stanovnika i najveća je MZ na području općine Cazin. Sastoji se od šest podružnica: Centar, Podgredina, Glogovac, Vilenjača, Zmajevac i Bajrići, a svaka podružnica ima svoje predstavnike u Savjetu MZ.

Šta smatrate ključnom prednošću vaše MZ-e u odnosu na ostale?

- Njena veličina je svakako značajna prednost, jer to podrazumijeva veliki broj raznovrsnih resursa. U narednom periodu ćemo se potruditi da iskoristimo svoje prednosti i razvoj podignemo na viši nivo.

Postoji li neki pozitivan trend razvoja i rasta vaše MZ-e?

- Smatram da postoji. U proteklih nekoliko godina riješeni su značajni infrastrukturni problemi, kao što su telekomunikacijska mreža, vodosnabdijevanje i veliki broj glavnih putnih komunikacija. Također se možemo pohvaliti značajnim brojem privatnih poduzetnika, sa kojima imamo vrlo dobru saradnju, te se nadam da će sve to generirati i novi razvoj.

Šta su najveći problemi u vašoj mjesnoj zajednici?

- Naše građane najviše muči loše stanje elektromreže, kao i činjenica da je regionalni put Cazin - Stijena jedan od najlošijih u našem kantonu. Naravno, i na tom planu se rade određeni pomaci, pa se nadam da će se stanje popraviti. I svakako, kao i na cijeloj općini, nepostojanje kanalizacione mreže.

Na koji način ostvarujete komunikaciju sa mještanima Vaše MZ-e?

- Putem redovnih obilazaka terena, koji se obavljaju po nekoliko puta godišnje i preko članova savjeta koji su direktni zastupnici svojih podružnica u Savjetu.

Da li MZ Stijena pruža neke sadržaje za kvalitetniji društveni život omladine?

- Cilj nam je da na svakoj podružnici obezbijedimo sportski teren, kako bi omladina dobila nove sadržaje. Svakako se trudimo da pomognemo i sportske klubove u našoj MZ u skladu sa našim mogućnostima. **Prioriteti MZ Stijena za naredni period?**

- Aktivnosti na poboljšanju stanja elektromreže i suradnja sa kantonalnom direkcijom oko rekonstrukcije regionalnog puta, kao i nastavak započetih infrastrukturnih projekata.

Kako ocjenjujete saradnju MZ Stijena i Općine Cazin?

- Smatramo da je suradnja na visokom nivou, što je i neophodno da bi mjesna zajednica bila kvalitetan prvi servis građanima.

Koju biste poruku uputili mještanima MZ Stijena, ali i građanima Cazina?

- Ovo je svakako pitanje više namijenjeno za predstavnike viših nivoa, jer oni imaju veći utjecaj, ali ono što bih želio poručiti svima nama je da će nam mjesna zajednica i općina biti onakve kakvima ih mi napravimo, te svi treba da se trudimo u tom pravcu da svoje obaveze korektno izvršavamo.

Načelnik odgovara

Zbog velikog broja pitanja koji pristižu na mail načelnika općine, odlučili smo i ovim putem odgovarati na najčešće postavljena pitanja. U ovom broju odgovoramo na pitanje o uređenju gradske sredine.

Polazeći od činjenice da je gradska sredina kameni spoticanja lokalnih neslaganja oko ravnomjernog i uravnoteženog razvoja cijele općine, moram naglasiti da naša briga za "čaršiju" ima svoj kontinuitet. Naime, trenutno su u fazi izrade tri glavna projekta čija bi realizacija trebalo da otpočne već ove godine. Radi se o projektu "kružnog toka", "uređenja stare čaršije i dijela Starog grada" i "sportski kompleks Alinac".

Sportski centar "Alinac" je u obuhvatu Regulačionog plana "Alinac" (koji je još u fazi izrade i usvajanja) i obuhvata površinu od oko 5900,0 m². Projektovana su dva terena za mali nogomet, jedan teren za rukomet, te jedan za košarku. Predviđena podloga terena za mali nogomet je umjetna trava, za rukomet akril i za košarku asfalt-beton. Posebno je značajno napomenuti da se u zimskom periodu predviđa postavljanje leda za klizalište na jednom od ovih terena. Pored terena za mali nogomet projektovane su AB tribine, sa mogućnošću smještaja oko 600 gledalaca, dok su za praćenje utakmica na terenima za rukomet i košarku predviđene manje montažne tribine. Ispod pomenutih, većih tribina, projektovane su ekipne i pojedinačne svlačionice, streljana, te nekoliko kancelarija.

Trg Alije Izetbegovića je centralni trg oko kojeg su smješteni objekti općinske uprave i niz značajnih javnih sadržaja. Postojeće saobraćajne površine i uređenje trga ne zadovoljavaju suvremene potrebe odvijanja saobraćaja, kako kolskog, tako i pješackog.

U našem slučaju formirana je pravilna kružna raskrsnica sa četiri okomita kraka: Gnjilavac, Alinac, Čuprija i Stara Čaršija - Žegar, čime je riješen kolski saobraćaj, a postavljanjem trotoara uz pomenute krakove obezbijedeno je neometano kretanje pješaka. Formiranjem raskrsnice ovog tipa i njenim dje-



limičnim dislociranjem u odnosu na položaj postojeće, dobila se veća površina ispred zgrade Općine, tako da se dobio manji urbani trg. Također, i ispred zgrade Gimnazije dobio se prostor koji je predviđen da se poploča, a samim time postoji mogućnost okupljanja ljudi i na tom dijelu. Prostor do objekata Doma kulture i MUP-a predviđen je kao zelena površina, sa niskim i visokim rastinjem. Isto tako, projektnim rješenjem nastojalo se i na ostalim dijelovima, prema objektima Gimnazije i Općine, zadržati što više zelenih površina i visokog rastinja.

Cilj zadatka uređenja stare čaršije odnosi se na mogućnost uređenja ulice kamenim pločama, uređenje i prijedlog obezbjeđenja kvalitetnije pješačke komunikacije uz obavezno ostavljanja korita Čajnog potoka otvorenim, obavezno savladavanje arhitektonskih barijera, za nesmetano korištenje hendikepiranim osobama, kao i mogućnost otvaranja predmetne ulice u svrhu gradskog korzoa, gdje bi bilo neophodno u određenom periodu obustaviti odvijanje motornog saobraćaja.

Također dati prijedlog sanacije i modernizacije fasada na objektima u predmetnoj ulici, kao i prijedlog zamjene rasvjetnih tijela, predvidjeti podzemnu garažu, iznad koje bi se postavili objekti tipa „trgovki“ u cilju oživljavanja starih zanata (sahadžija, obučar...). Poseban tretman dati objektu medrese. Prostor koji je tretiran ovim projektnim zadatkom smješten je u najstroži centar grada, te kao takav mora da ima vrhunski tretman u svim sferama namjeravanih intervencija.



Tehnički podaci

Izdavač: Općina Cazin

Urednik: Irma Alićajić, dipl.pol.

Autorski tim:

Alisa Tatarević, dipl.žur. (RTV Cazin)

Adisa Muhamedagić (RTV Cazin)

Irma Alićajić, dipl.pol. (Općina Cazin)

Hamdija Ljubijankić, prof. (Općina Cazin)

Hafeza Begić, dipl.ing.arh. (JP Komunalno-stambeni fond Cazin)

Mirhad Pjanić, dipl.ing.maš. (JP "Vodovod" Cazin)

Kontakt: opcina.bilten@gmail.com

Lektor: EVRON d.o.o. Banjaluka

Dizajn: EVRON d.o.o. Banjaluka

Štampa: GRAFIS DOO Cazin